

## **DASAR PENGURUSAN SISA PLASTIK NEGERI PULAU PINANG**

- 1.0 Pada tahun 2010 Kerajaan Negeri Pulau Pinang telah memperkenalkan slogan Cleaner, Greener, Safer & Healthier Penang sebagai asas untuk memacu Negeri Pulau Pinang ke arah mencapai sasaran Negeri Hijau pertama di Malaysia. Susulan itu, pelbagai program hijau berteraskan slogan Cleaner, Greener, Safer & Healthier Penang telah diperkenalkan bagi merealisasikan aspirasi Pulau Pinang menjadi Negeri Hijau. Aspirasi ini telah dikemaskini dari semasa ke semasa melalui penyelarasan dengan perkembangan terkini ke arah mencapai sasaran United Nations' Sustainable Development Goals (UNSDGs). Isu penggunaan dan kebergantungan kepada produk plastik serta kaedah pelupusan yang tidak sistematik telah menyebabkan berlakunya pencemaran alam yang serius. Justeru itu, Dasar Pengurusan Sisa Plastik Negeri Pulau Pinang dirangka bagi meminimumkan impak kesan pencemaran plastik di Negeri Pulau Pinang.
  
- 2.0 Dasar Pengurusan Sisa Plastik Negeri Pulau Pinang dirangka sebagai dasar induk bagi memastikan polisi-polisi yang dilaksanakan berkaitan pengurusan sisa plastik dapat diselaraskan dengan berkesan. Polisi Tak Nak Plastik Sekali Guna (*No To Single-Use Plastic*) telah diperkenalkan di bawah Dasar Pengurusan Sisa Plastik Negeri Pulau Pinang melalui program/kempen berikut:-
  - (i) Hari Tanpa Beg Plastik Percuma (*No Free Plastic Bag Day*); dan
  - (ii) Larangan Penggunaan Penyedut Minuman Plastik (*No To Plastic Straw*).
  
- 3.0 Dasar Pengurusan Sisa Plastik Negeri Pulau Pinang menggunakan pendekatan pengurusan dan kawalan terhadap kitaran hayat produk-produk plastik sekali guna dari peringkat pengeluaran sehingga ianya dilupuskan dengan impak yang minimum terhadap alam sekitar dan ekonomi serta pada masa yang sama mengambil kira kepentingan pemegang taruh (*stakeholders*) yang terlibat seperti berikut:-
  - (i) Alam Sekitar;
  - (ii) Rakyat;
  - (iii) Pengilang; dan
  - (iv) Kerajaan.

- 4.0 Pelaksana dasar Dasar Pengurusan Sisa Plastik Negeri Pulau Pinang adalah Pihak Berkuasa Tempatan menggunakan punca kuasa di bawah Undang-undang Kecil Kerajaan Tempatan.
- 5.0 Sasaran dasar adalah seperti berikut:-
- Jangka Pendek : Meminimumkan impak pencemaran plastik terhadap alam sekitar
  - Jangka Panjang : Peralihan penggunaan produk pengganti kepada plastik (*substitute product to plastic*) melalui penggalakan ekonomi hijau (*green economy*)
- 6.0 Kementerian Tenaga, Sains, Teknologi, Alam Sekitar dan Perubahan Iklim (MESTECC) [sekarang dikenali sebagai Kementerian Alam Sekitar dan Air (KASA)] telah memperkenalkan "*Malaysia's Roadmap Towards Zero Single-Use Plastics 2018-2030*" yang akan menjadi pelan halatuju Negara ke arah pembasmian penggunaan plastik sekali guna. Justeru, perancangan Kerajaan Negeri dalam Larangan Penggunaan Plastik Sekali Guna adalah diselaraskan dengan pelan halatuju nasional tersebut.
- 7.0 Penggunaan dan pelupusan plastik sekali guna seperti beg plastik dan penyedut minuman plastik tanpa kawalan akan memberi ancaman besar kepada alam sekitar dan kesihatan sekiranya ia tidak dikawal dan diurus dengan betul. Justeru, kempen ini akan membantu kerajaan dalam mengawal masalah pencemaran alam sekitar yang semakin membimbangkan seperti pencemaran sungai dan laut. Plastik sekali guna yang telah digunakan secara amnya akan berakhir di tapak pelupusan sampah atau hanyut ke lautan dan memberi kesan kepada hidupan laut, alam sekitar dan manusia sendiri.
- 8.0 Sekiranya pengguna dapat mengurangkan penggunaan beg plastik dan penyedut minuman plastik dengan menggantikannya dengan bahan alternatif yang lebih mesra alam atau yang boleh diguna berulang kali, ianya dapat mengurangkan jumlah sampah yang dihantar ke tapak pelupusan sampah dan sekaligus dapat memanjangkan jangka hayat tapak pelupusan sampah di samping melindungi bio-diversiti marin dari ancaman sisa plastik.

## **Hari Tanpa Beg Plastik Percuma (No Free Plastic Bag Day)**

- 1.0 Kempen Hari Tanpa Beg Plastik Percuma (*No Free Plastic Bag Day*) masih berkuatkuasa sehingga kini dan diselaraskan sebagai sebahagian dari Polisi Tak Nak Plastik Sekali Guna (*No To Single-Use Plastic*). Kempen Hari Tanpa Beg Plastik Percuma Negeri Pulau Pinang (*Plastic Bag 1.0*) telah dilaksanakan selama lapan (8) tahun dari 2009 hingga 2016 melalui penyertaan secara sukarela (*voluntary basis*) oleh premis-premis perniagaan dengan mengenakan kutipan RM0.20 sen bagi setiap beg plastik yang diberikan kepada pengguna.
- 2.0 Pada tahun 2017, semakan semula telah dilakukan untuk memastikan kempen ini terus berdaya saing bagi mencapai matlamat utamanya iaitu mengurangkan penggunaan beg plastik demi kepentingan alam sekitar. Justeru itu, Garis Panduan Baharu bagi Kempen Hari Tanpa Beg Plastik Percuma Negeri Pulau Pinang 2.0 (*Plastic Bag 2.0*) telah disediakan pada 1 Mac 2017 bertujuan sebagai asas panduan serta rujukan penambahbaikan pelaksanaan Kempen Hari Tanpa Beg Plastik Percuma Negeri Pulau Pinang.
- 3.0 Kempen *Plastic Bag 2.0* mendefinisikan beg plastik sebagai sebarang bentuk beg yang dibekalkan kepada pengguna di kaunter bayaran, di mana komponen asasnya diperbuat daripada plastik (polimer sintetik/semi sintetik) dan juga termasuk beg plastik bio-degradasi (*bio-degradable plastic bag*). Plastik bagi pembungkusan (*wrapper*) produk/minuman/makanan tidak termasuk sebagai kategori beg plastik yang dikenakan caj RM0.20 dalam kempen ini.
- 4.0 Negeri Pulau Pinang telah melaksanakan Kempen Hari Tanpa Beg Plastik secara wajib pada setiap Isnin, Selasa dan Rabu bermula 1 Januari 2021. Manakala caj kutipan RM0.20 yang dikenakan bagi penggunaan plastik dinaikkan ke RM1.00 pada setiap hari Khamis, Jumaat, Sabtu dan Ahad.
- 5.0 Premis perniagaan yang wajib berdaftar dengan pelaksanaan *Plastic Bag 2.0* adalah terdiri daripada semua premis perniagaan sedia ada dan premis perniagaan baharu yang akan mula beroperasi dalam kategori berikut:-

- (i) Pasaraya Hyper (*Hypermarket*);
- (ii) Pasaraya Besar (*Supermarket*);
- (iii) Pasaraya Serbaneka (*Departmental store*);
- (iv) Kedai Serbaneka (*Convenient store*);
- (v) Restoran Makanan Segera (*Fast Food Restaurant*);
- (vi) Kedai Serbaneka Stesen Minyak (*Petrol Station Convenient Store*);
- (vii) Kedai Rangkaian (*Chain Store*);
- (viii) Farmasi (*Pharmacy*); dan
- (ix) Lain-lain premis perniagaan berkaitan yang akan dimasukkan ke dalam senarai ini pada masa akan datang (*Others*).

Nota: Pasar awam dan penjaja adalah dikecualikan.